

luis assertionibus nimium transilire. Apud te enim nobilissime uir eligo quàm apud deum perennis reatus culpas incurrere. Pascentius uir clarissimus respondit: Scripta quæ pro posui, non sunt quidem in lege, sed debere propter honorem patris astrui recte defenduntur. Laurentius uir clarissimus dixit: Sic ergo & homusio quod in dubium ueniebat te proponete, & si scriptum non est, res ipsa tamen quæ latet in uerbo, uera est. Credatur honorifice unitati, ne fiat iniuria trinitati.

Augustinus Probæ & Iulianæ nobilibus uiduis gratulatur de Demetriade, quæ uirginitatis uelum acceperat, agēs gratias pro munusculo misso. Ep. CLXXIX

DOMINARVM honore dignissimis, merito illustribus & præstantissimis filiabus Probæ & Iulianæ, Augustinus in domino salutem. Impletis gaudior nostrum, tanto iocundius quanto charius, tanto gratius quanto citius. Vestra nanque stirpis sanctimoniam uirginalem, quoniam quacunque innotuitis, ac per hoc ubique fama celeberrima prædicat, uelocissimum uolatum eius fidelior atque certiore litterarū nuncio præuenistis, & prius nos fecistis exultare de cognito tam excellenti bono quàm dubitare de audito. Quis uerbis explicet? quis digno præconio profectur, quantum incomparabiliter gloriosius atque fructuosius habeat ex uestro sanguine feminas uirgines Christus, quàm uiros consules mundus? Nam uolumina temporum, si magnum atq; præclarum est nominis dignitate signare, quanto est maius atq; præclarus cordis & corporis integritate transcendere? Magis itaque gaudeat puella nobilis genere, nobilior sanctitate, quod sit per diuinum consortium præcipuam in cœlis consecutura sublimitatem, quàm si esset per humanū connubium prolem propagatura sublimem. Generosus quippe elegit Aniciana posteritas tam illustrem familiam beare nuptias nesciendo, quàm multiplicare pariendo, & in carne iam imitari uitam angelorum, quàm ex carne adhuc numerum augere mortalium. Hæc est uberior fecundiorq; felicitas, nō uentre grauescere, sed mente grandescere: non lactescere pectore, sed corde candescere: non uisceribus terram, sed cœlum orationibus parturire. Dominarum honore dignissimæ filia, perfruemini in illa quod defuit uobis, perseveret usque in finem, adhærens coniugio quod non habet finem. Imitentur eam multæ familiæ dominam, ignobiles nobilem, fragiliter excelssæ excelsius humilem, uirgines quæ sibi optant Aniciorum claritatē, eligant sanctitatem. Illud enim quantalibet cupiditate quando assequuntur? Hoc autem si plene cupierint, mox habebunt. Protegat uos incolumes & feliciores dextera altissimi, dominæ honore dignissimæ & præstantissimæ filia: pignora sanctitatis uestre, præcipue ipsam sanctitatem præcipuam debito uestris meritis officio dilectione domini salutamus. Velationis apophoretum gratissime accepimus.

Augustinus Honorato episcopo, distinctius explicat, quibus, quādo, & quomodo fugiendum, imminente periculo. Epistola CLXXX

SANCTO fratri & coepiscopo Honorato, Augustinus in domino salutem. Charitati tuæ misso exemplo epistolæ, quam fratri Quoduult deo nostro coepiscopo scripsi, putabā me hoc onere caruisse, quod mihi imposuisti, quærendo cōsiliū quid in his periculis, quæ tempora nostra inuenerunt, facere debeatis. Quamuis enim epistolam illam breuiter scripserim, nihil me tamen prætermisisse arbitror, quod & respondentem dicere, & quærenti audire sufficeret: quandoquidē dixi, nec eos esse prohibendos, qui ad loca, si possunt, munita migrare desiderāt, & ministerij nostri uincula, quibus nos Christi charitas alligauit, ne deseramus ecclesias quibus seruire debemus, non esse rumpēda. Ista quippe uerba sunt quæ in illa epistola posui. Restat ergo, inquam, ut nos, quorum ministerium quantulacunque plebi dei ubi sumus manenti, ita necessarium est ut sine hoc eam non oporteat remanere, dicamus domino: Esto nobis in deum protectorem & in

psalm. 70